

# Rau To Paulus Imbooda Ila To Yes Kolosia

## Kolosi

---

**1** <sup>1-2</sup>You Paulus. Maaron itaghon tau lolo, ve ighur ghou nanim mbaŋooŋa to Yesu Krisi. Yeru toŋvetaz toit Timoti nimbood rau tonene ilat to yam tamtoghon patabuaŋa to Maaron to aneep izi ndug Kolosi. Yam toŋvetaz to aneep tuŋia ila to Yesu Krisi, ve akis ghurla tiam ariana.

Tamaan Maaron ighur poia toni iza tiam, ve iŋgin gham aneep pooi toman lolomim luuma. Onoon.

### Paulus lolo poia pa ŋgar to yes Kolosia

<sup>3</sup>Sawa isob to yeru nighur gham ila sunuŋ tiei, nipait Tiina toit Yesu Krisi Tama Maaron toman lolomai poia kat. <sup>4</sup>Pasa, nilooŋ varumim tighaze yam aghur ila to Yesu Krisi ariana, ve aneep tuŋia ila toni. Ve lolomim pa Maaron tamtoghon toni patabuaŋa tisob, ve aghamgham poian di. <sup>5</sup>Ŋgar tiam tonanan, yam ataghoni pasa, yam awatag: Maaron ighur gham pa agham nepooŋ poia izi ndug sambam. Tauto aghurghur matamim pa nepooŋ tonowen ve asasaŋan. Sawa to tivotia saveeŋ onoon to varu poia payam, yam alooŋ nepooŋ tonenen saveeŋ.<sup>a</sup>

<sup>6</sup>Saveeŋ to varu poia to ilat peria tiam, nene ighurghur anoŋa popoia naol tivotvot irau ndug tisob, raraate animale tivotvot payam. Sawa inim mata to yam alooŋ poia to Maaron saveeŋa ve aghazoŋ pani, ve inim aazne, varu poia ighurghur anoŋa popoia tivotvot ila lolomim.<sup>b</sup>

<sup>7</sup>Itaad ite Epapras to yeiŋa nimbessmbees pa Krisi ne, lolomai pani kat. Ye mbesooŋa poia eez to Krisi, ve tini imbees kat pa uraat toni. Ye igham naghomai, ve ipatoot gham pa saveeŋ onoon to varu poia.<sup>c</sup>

<sup>8</sup>Ye ipaesia varumim payei ighaze Avuvu Patabuaŋ ipamundigin gham ve aghur lolomim kat pa Maaron ve tamtoghon paam.

---

a 1:5 1Tes 1:3; 1Pe 1:4    b 1:6 Yo 15:5    c 1:7 Kol 4:12; Plm 23

### Paulus ighason Maaron pa ipalot yes Kolosia

<sup>9</sup>Tovenen sawa to nilooŋ varumim ve inim, yei nighurghur gham ila sunjuuŋ tiei. Sawa isob, nighason Maaron pa ipavonin gham pa ŋgar popoia tisob to tinim pa ye tau Avuvu, ve ipaghazoŋan gham pa ŋgar to ye lolo pani.<sup>d</sup>

<sup>10</sup>Leso laghoon tiam denja itaghon poia to Tiina toit Krisi ipatoonja payam, ve ŋgar tiam isob ighami lolo poia. Ve yam pale agham uraat popoia naol naol tinim ghurla tiam anonja, ve ŋgar tiam ivotvot le awatag katin Maaron.<sup>e</sup>

<sup>11</sup>Maaron toit, ye ariana ve iza tiina pa tapiri. Yei nighaze Maaron ipavonin gham kat pa tau tapiri, ve ipalot gham. Leso ayoon ariana pa badoon pataŋani to naol ne, <sup>12</sup>ve apait Tamaan Maaron toman lolomim poia. Pasa, ye igham mulin gham, ve aazne yamja tamtoghon toni patabuana asob izamim iyoon pa agham nepoon poia ila ye tau ŋguruba izi ndug sambam.<sup>f</sup>

<sup>13</sup>Muuŋ, ŋgar to ndoroom igham pooz pait. Ve aazne, Maaron ipas ghiit tavot pa ndoroom tapiri, ve ighur ghiit taneep ila Natu Yesu Krisi samba, lesa tataghon pooz toni. Natu tonowen, ye lolo pani kat.<sup>g</sup>

<sup>14</sup>Aghita. Iit to taneep tunja ila to Krisi ne, ye ipul tau imaat pa ireu sosor toit, ve ipas ghiit tavot pa samia tapiri.<sup>h</sup>

### Krisi iŋgin mbef tisob

<sup>15</sup>Onoon, iit irau taghita Maaron maau. Eemoghon uraat toman ŋgar to Natu Yesu Krisi, tauto ipatoon Tama Maaron ivot ighazoŋ pait.<sup>i</sup>  
Krisi imuuŋ pa mbef tisob to Maaron ighur di, ve inim daba padi.

<sup>16</sup>Pasa, Maaron ighur mbef tisob tivot ila Krisi nima.

Mbef to sambam, ve mbef to taan. Mbef to taghita di pa mataad, ve mbef to taghita di maau ne paam.

Yes daba to tanepneep ila sambadi ne, ve mbef pida to tapiridi ve izadi tintina ne paam. Inimale yes anjela ve avuvu arianaadi naol naol paam.<sup>j</sup>

Mbef naol tonowen, Maaron ighur di tisob tivot ila Natu nima, ve tineep pa timbees pani.<sup>k</sup>

<sup>17</sup>Sawa to mbef eta ivot sone, Natu ye inepneep.

---

**d** 1:9 Ep 1:17, 5:17    **e** 1:10 Yo 15:16; Ep 4:1+; Pil 1:27    **f** 1:12 Mbanj 26:18; Ep 1:11,18, 3:16  
**g** 1:13 Mbanj 26:18; 1Pe 2:9    **h** 1:14 Ep 1:7+    **i** 1:15 Yo 1:18, 14:9; 2Kor 4:4; Hib 1:3    **j** 1:16 Avuvu arianaadi ijarua mbef inimale navou, pughuun, yanjanja, ve mbef pida paam.    **k** 1:16 Yo 1:3,10; Hib 1:2; 1Pe 3:22

Ve ye moghon to ikiskis mbeb tisob tineep tunja ila inadi.

<sup>18</sup> Ye inim daba pa lupuuŋ toni ve igham pooz padi. Ve yes tinimale ye anoŋa.

Ye to imundig pa mateeŋ muuŋ, ve inim pughu pa mundigiin to yes mateeŋa.

Tauto iza ivot inim tiina le ilib pa mbeb tisob.<sup>l</sup>

<sup>19</sup> Tovenen Maaron itaghon tau lolo, ve ighur tapiri toman iza, ve ŋgar toni isob ineep ila to Natu.<sup>m</sup>

<sup>20</sup> Koi to ineep ila iit, Maaron, ve mbeb tisob to sambam ve taan sosood, Maaron ighaze ipasobi, ve igham ghiit toman mbeb tisob tonowen ve tamuul tala to ye tau.

Pughu tonene to Natu siŋ toni imaliŋ izala ai pambarooŋ ve imaat. Leso ipasob koi tonowen le isob kat, ve itiŋa Maaron talup ghiit tanim ee moghon, ve taneep pooi.<sup>n</sup>

### **Krisi ipasob koi to ineep ila Maaron ve yes Kolosia sosodi**

<sup>21</sup> Muuŋ, yamŋa Maaron irau alup gham maau. Koi ineep ila sosomim, ve aneep sagan sagan. Pasa, ŋgar tiam poia maau, ve aghur koi pani, ve aghamgham ŋgar samsamia naol.<sup>o</sup>

<sup>22</sup> Eemoghon aazne, ye ipasob koi tonenen, ve yamŋa alup gham anim ee moghon wa. Pasa, ye ipul Natu izi inim taan, ve iyamaan yabyabuŋ ila tini ve imaat. Tauto ireu sosor tiam. Leso sawa to igham gham ala ayoon ila Maaron mata, Maaron pale ighita gham ighaze yam tamtoghon toni patabuaŋa. Lemim sosor eta maau, ve lemim saveeŋ eta maau.<sup>p</sup>

<sup>23</sup> Eemoghon yam irau akis ghurla tiam ariana, ve ayoon tunja ila to Krisi. Ve ŋgar to sananiin nepooŋ poia to Maaron ighaze igham pait, nene mbeb eta ighereb gham ve apuli malep. Varu poia to tisavia payam ve alooŋa, nene isavia nepooŋ tonowen, ve tivotia irau ndug tisob to tineep ila sambam paroŋania. Ve you paam, Krisi ighur ghou nanim mbesooŋa pani.<sup>q</sup>

### **Paulus ipul tau pa uraat to Krisi**

<sup>24</sup> Onoon, aazne you nambaad pataŋani ve nayamaan yabyabuŋ ila tinig pa nauul gham. Eemoghon lolog poia. Pasa, pataŋani naol to Krisi imbaad di, nene tisob sone. Tauto poia pa anag nauuli ve nambaad pida.

---

l 1:18 1Kor 15:20,23; Ep 1:22+ m 1:19 Kol 2:9; Hib 1:3 n 1:20 Ro 5:1,10; 2Kor 5:18+; 1Yo 2:2 o 1:21 Ep 2:3,12 p 1:22 Ep 1:4, 2:14+; Jud 24 q 1:23 Mk 16:15; Kol 1:6, 2:7

Nene inimale you nimag to nauul lupuuŋ to Krisi. Pasa, lupuuŋ toni, nene inimale ye anoŋa.<sup>r</sup>

<sup>25</sup>Maaron inumeer ghou ve ighur uraat inim nimag pa nauul lupuuŋ to Krisi. Ve ye ighaze napatoot gham pa saveeŋ toni to naol ne, leso awatag katin ŋgar toni.<sup>s</sup>

<sup>26</sup>To muuŋ we, sawa to nditumbuud ve inim, ŋgar to you nasasavia ne, iyooŋ. Tovenen tamtoghon tikankaan pani. Eemoghon aazne, Maaron ivotia ŋgar yonŋaŋ tonene pa tamtoghon toni patabuaŋa ve ighazooŋ wa.<sup>t</sup>

<sup>27</sup>Ye igham tovene, leso yam to Yuda maau ne awatagi paam. Ŋgar yonŋaŋ tonene, mbeb poia kat, ve ipaghazoŋan ghiit pa Maaron tapiri ve poia toni. Ŋgar tonene iŋarua Krisi to aazne ineeŋ ila yam lolomim.<sup>u</sup> Ye ndamo payam, tauto yam asasaŋan sawa to ye igham mulin gham, ve yamŋa aneeŋ ila Maaron ŋguruba izi ndug sambam.<sup>v</sup>

<sup>28</sup>Tovenen yei nivovotia Krisi varu pa tamtoghon tisob, ve nipatoot di, ve nisavsaaŋ arianaŋ padi. Leso tiwatag ŋgar popoia tisob to tinim pa Maaron, ve sawa to nighur di tila toni, ye pale ighita di ighaze yes tisob tiraua kat pa ŋgar to Krisi.<sup>w</sup>

<sup>29</sup>Ŋgar tonene to ipapamundigin ghou, tauto nazuaria ghou kat, ve narab taug pa uraat tiou. Ve tapiri tiina to naghamaŋhami ila to Krisi, nene ipalot ghou pa uraat tiou.<sup>x</sup>

### Paulus ighaze yes Kolosia tiwatag katin Krisi

**2** <sup>1</sup>You naghaze yam awatag tovene: You narab taug pa uraat ve napaŋab arianaŋ, leso nauul gham toman nditaad pida to tineep izi ndug Laodisia. Ve yam moghon maau. Tamtoghon tisob to tighita naghog sone ne paam, you naghaze nauul di.<sup>y</sup>

<sup>2</sup>You naghaze napalot gham ve napaŋaŋ ŋgar tiam, leso lolomim pa taumim ve agham poian gham, ve alup lolomim inim ee moghon. Ve awatag katin ŋgar yonŋaŋ to Maaron to aazne ivot ighazooŋ, ve aghur ila arianaŋ aghaze nene onoon. Ŋgar tonowen iŋarua Krisi.<sup>z</sup>

<sup>3</sup>Pasa, Maaron ŋgar toni to naol ne, tisob tineep ila to Krisi, tinimale mbaliiŋ to tamtoghon tighuri izala katkaat leso ineeŋ pooi.<sup>a</sup>

<sup>4</sup>Saveeŋ tonene, you nasavia pasa, namatughez pa saveeŋ ŋgoreeŋ to ndiran pida. Onoon, tamtoghon pida tilooŋ saveeŋ todi, ve tighur ila. Eemoghon yam aghur ila malep.<sup>b</sup>

**r 1:24** 1Kor 12:27; 2Kor 1:6+; Ep 3:13; Pil 2:17 **s 1:25** Ga 2:7; Ep 3:2,7+

**t 1:26** Ro 16:25+; 1Kor 2:7; Ep 3:3-9 **u 1:27** Ŋgar yonŋaŋ to Maaron, nene vene: Ye ighaze igham mulin tamtoghon to ndug ndug ve ipatooŋ poia toni padi, ve Krisi ilup di tinim lupuuŋ ee moghon, ve ineeŋ ila lolodi. Yes Yuda, ve yes to Yuda maau ne paam.

**v 1:27** Ep 1:18 **w 1:28** Mt 5:48; Ep 4:13 **x 1:29** Mbaŋ 20:20; 1Kor 15:10; Ep 3:7; Pil 4:13 **y 2:1** Kol 4:13,16; Syg 3:11+ **z 2:2** Ep 3:18+; Pil 1:9 **a 2:3** 1Kor 1:24,30 **b 2:4** Ro 16:17+; Ep 5:6

<sup>5</sup>Aghita, aazne you naneep saguan payam. Eemoghon Maaron Avuvu ilup ghiit, ve ngar tiou ineeep tiam inimale itija tanepneep. You naghita naghaze uraat tiam ilaan denja, ve aghur ila to Krisi ariana. Tauto igham ghoulolog poia kat.

### Tagham tapiriid ila to Krisi

<sup>6</sup>Yam agham Yesu Krisi inim Tiina tiam wa. Tovenen laghoonj tiam, yam irau aneeep tunja ila toni, ve ataghon ngar toni irau sawa isob.

<sup>7</sup>Lolomim ikis Krisi kat, ve agham tapirimim ila toni, animale ai to waria izila kat. Ve ayoon tunja ila toni, animale ruum to tireii izala gungun ariana. Ve aghur ila toni ariana. Leso ataghon saveej to tipatoot gham pani. Ve lolomim poia pa Maaron ve apaiti pa poia toni irau sawa isob.<sup>c</sup>

### Paulus iveivei pa yes Kolosia pa ndiran pida to tighaze tiweu di ve tipul muridi pa Krisi

<sup>8</sup>Apatum gham pa yes kaaromja. Pa vene, tiweu gham ve ataghon di. Saveej to tisasavia, nene saveej tau maau. Nene saveej sorok to itaghon ngar to nditimbudi muuj ve inim. Le anoja maau. Ndiran tonowen tighaze titaghon ngar to avuvu naol to tinjin mbeb to sambam paronania ve taan. Eemoghon saveej todi itaghon Krisi ngar toni maau.<sup>d</sup>

<sup>9</sup>Krisi, ye tamtoghon inimale it. Eemoghon Maaron iza, toman tapiri ve ngar toni, nene isob ineeep toni.<sup>e</sup>

<sup>10</sup>Ve mbeb naol to tapiridi tintina ve tighamgham pooz pait ne, ye inim daba padi ve injin di. Tovenen yam to aneeep tunja ila to Krisi, ye ipavonin gham kat pa Maaron tapiri ve ngar toni isob, ve agham nepoonj poia kat ila toni.<sup>f</sup>

<sup>11</sup>Alooj. Yam to aneeep tunja ila to Krisi, ngar tau to ziroonj ivot payam wa. Nene nasavia ngar to tamtoghon tighami pa nimadi ne maau. You nasavia uraat to Krisi ighami ila lolomim, lesu indiir ngar to lolomim munjina ighau payam.<sup>g</sup>

<sup>12</sup>Ijgara tovene: Sawa to agham ya, yam alup toman Krisi pa mateej toni, ve titavia gham toman Krisi. Ve Maaron igham gham alup toman Krisi pa mundigiinj toni paam, tauto agham nepoonj paghu ila toni. Pasa, yam aghur ila Maaron tapiri to ipamundigin Krisi pa mateej.<sup>h</sup>

### Uraat tiina to Krisi ighami izala ai pambaroonj

<sup>13</sup>Muuj, yam agham ngar naol to tiyel pa tutuuj to Maaron, ve ataghon ngar to lolomim munjina. Pasa, sawa tonenen, Krisi indiir ngar to

**c** 2:7 Ep 2:20+, 3:17; 1Tes 5:18 **d** 2:8 Mk 7:3; Ga 4:3,9; 1Tim 4:1+; Hib 13:9

**e** 2:9 Yo 1:14+; Kol 1:15,19 **f** 2:10 Yo 1:16; Ep 1:21+; 1Pe 3:22 **g** 2:11 Ro 2:29; Pil 3:3

**h** 2:12 Ro 6:3+; Ep 2:6, 3:7; Kol 3:1+

lolomim mungina sone. Tovenen nepooŋ tiam, yam animale yes mateeŋa. Lemim ghilalooŋ pa Maaron maau, ve irau agham ŋgar poia eta maau. Eemoghon aazne, Maaron ipamundigin gham toman Kriŋi, ve agham nepooŋ paghu ila toni. Pasa, ye ireu sosor toit isob ilale wa.<sup>i</sup>

<sup>14</sup>Muun, iit leed sosor tiina kat ila Maaron mata. Eemoghon aazne, Kriŋi ipasob sosor toit isob. Nene inimale timbood ŋgar toit to tiyel pa tutuuŋ to Maaron ne ila rau, ve Maaron irabi izala ai pambarooŋ to Kriŋi.<sup>j</sup>

<sup>15</sup>Ve avuvu arianaŋadi naol, toman mbef naol to tapiridi ve izadi tintina ne paam, sawa to Kriŋi imaat izala ai pambarooŋ, Maaron ilib padi ve ipasob tapiridi. Ghoru iweu di tila, ipayoon di ila ival tiina matadi, ve ipamayanjin di.<sup>k</sup>

### Tutuuŋ to tamtoghon irau iuul ghiit pa tawatag Maaron ne maau

<sup>16</sup>Tovenen ighaze ndiran pida tighita gham ataghon tutuuŋ todi maau, ve tiyou avodi payam tighaze agham sosor, yam agham ŋgar naol pa saveeŋ todi malep. Nene nasavia tutuuŋ todi pida to tiŋarua mbef to aghan di ve aghun di, ve tutuuŋ to tiŋarua lupuuŋ tintina to suŋuuŋ, ve suŋuuŋ to ivotvot ila sawa to kaiyo iza paghu, ve umbom patabuaŋ to Maaron.<sup>l</sup>

<sup>17</sup>Pasa, mbef to tisavia di, nene mbef tau maau. Nene tinimale mbef to ivot muri ne anunu. Ve mbef tau, nene Kriŋi.<sup>m</sup>

<sup>18</sup>Ndiran pida, avodi iyaryaŋ tighaze yam irau atatan taumim ve awaghamun taumim, leso anim tamtoghon patabuaŋa. Ve tighaze yam asuŋ pa yes aŋela ve apait di. Ndiran tovene, ighaze todi eta iveleg gham, ve ipambar ate pa tandagiin to ye ighita, yam aghur ila saveeŋ toni malep. Pa vene, iweu gham ala ayel pa ataam to Maaron. Ghoru agham atia tiam poia maau. Tamtoghon tovene, ye ipakur tau sorok itaghon ŋgar to taan moghon. <sup>19</sup>Ye ilup toman Kriŋi maau. Eemoghon iit tawatag: Kriŋi, ye inim daba pait ve igham pooz pait. Ve iit to taneep ila lupuuŋ toni ne, tanimale ye tau anoŋa. Iit tanimale Kriŋi seŋgaŋa ve waro eŋaŋa to tikis babaŋa pida tineep tunja ila inadi. Ve ye ipapalot ghiit ve ilup ghiit tanim ee moghon. Tauto ila Maaron tapiri, lupuuŋ to Kriŋi ivot inim tiina, ve iyaryaŋ.<sup>n</sup>

<sup>20</sup>Yam alup toman Kriŋi pa mateeŋ toni, ve apul nepooŋ tiam mungina wa. Tovenen avuvu naol naol to sambam paroŋania ve taan, yam aneep ila sambadi muul maau. Ighaze venen, pughu vena to yam aneep animale yes to taan, ve ataghon tutuuŋ naol to tiŋarua mbef to taan?<sup>o</sup>

---

i 2:13 Ro 6:13; Ep 2:1,5,11 j 2:14 Ep 2:15+; 1Pe 2:24 k 2:15 Mbnp 3:15; Lu 11:22; Yo 12:31 l 2:16 Mk 7:19; Ro 14:3+; 1Kor 8:8; Ga 4:9+ m 2:17 Hib 8:5, 10:1 n 2:19 Ep 1:22, 2:21, 4:15+ o 2:20 Ro 6:6; Ga 4:3+, 4:9

<sup>21</sup>Tutuunj tovene: “Mbeb tonene, yam aghami malep, akisi malep, aghani malep.”<sup>p</sup>

<sup>22</sup>Aghita. Tutuunj naol to tijarua aniiñ ma mbeb tovene, nene tisavia mbeb to taghami ve taghani, ve isob. Tutuunj tovene titaghon njarar to tamtoghon moghon. Pasa, tamtoghon to tighur di ve tisaav pait tighaze tataghon di.<sup>q</sup>

<sup>23</sup>Onoon, tutuunj tovene, tamtoghon pida tighita di tighaze nene njarar poia. Pasa, matadi iñgal tovene: Ighaze tizuaria di kat pa Maaron, ve titatan taudi, ve tiwaghamun taudi anonadi, nene pale igham sunjuunj todi poia kat ila Maaron mata. Eemoghon tutuunj tovene irau tiuul ghiit pa tatatan njarar samia to lolood muñgina ne maau.

### Mataad iñgal mbeb to ndug sambam

**3** <sup>1</sup>Maaron ipamundigin gham toman Krisi ve agham nepoonj paghu wa. Tovenen yam irau azuaria gham pa mbeb to sambam. Pasa Krisi, ye ineeep tonowe ila Maaron nima waan.<sup>r</sup>

<sup>2</sup>Agham njarar pa mbeb to taan malep. Njarar tiam iyaryaanj pa mbeb to sambam moghon.<sup>s</sup>

<sup>3</sup>Pasa, yam alup toman Krisi pa mateenj toni, ve nepoonj tiam muñgina isob wa. Ve nepoonj tiam paghu, nene mbeb to aazne ineeep njozoaanj toman Krisi ila to Tama Maaron.<sup>t</sup>

<sup>4</sup>Tovenen Krisi inim pughu pa nepoonj paghu to aazne yam aghami. Ve muri, sawa to ye imuul inim ve ipatoonj tau ivot ighazoonj, nene pale Maaron ipatoonj gham toman Krisi, ve yamña Krisi apatoonj Maaron tapiri, njararuba, ve poia toni ivot ighazoonj.<sup>u</sup>

### Tapul njarar muñgina ineeple

<sup>5</sup>Tovenen njarar samsamia naol to taan to tineep ila lolomim, yam arab matin di. Njarar tovene: Njarar to ghuruunj maat, njarar to iñgalaanj maau, njarar to lolood igham pa mbeb samsamia, njarar to tangin poian tauud maau ve tala pa naghood moghon, ve njarar to mataad mbeb. Aghita. Njarar to mataad mbeb, nene inimale tambees pa maaron kaarom.<sup>v</sup>

<sup>6</sup>Aloonj. Yes to tizorzoor Maaron aliña ve tinoknok ghamuunj njarar samsamia tovene, mbalmbali to Maaron pale iza todi.<sup>w</sup>

<sup>7</sup>Muunj, yam paam, laghoonj tiam toman nepoonj tiam, ataghon njarar tovene.<sup>x</sup>

<sup>8</sup>Eemoghon aazne, yam irau apul njarar samsamia tisob tineepledi. Njarar tovene: Njarar to takis ateed yabyab, njarar to ateed izaza pa malmal

---

p 2:21 1Tim 4:1+ q 2:22 Mt 15:9+ r 3:1 Mk 16:19; Ep 1:20, 2:6; Kol 2:12  
s 3:2 Mt 6:33; Ro 8:5 t 3:3 Ga 2:20 u 3:4 1Kor 15:43; Ga 2:20; Pil 1:21, 3:21; 1Yo 3:2  
v 3:5 Ro 8:13; Ga 5:24; Ep 5:3+ w 3:6 Ro 1:18; Ep 5:6 x 3:7 1Kor 6:11; Ep 2:2+;  
1Pe 4:3

rikia, ghuruuŋ koi, ŋgar to tasavia saveeŋ samia pa nditaad, ve ŋgar to ghamuuŋ kombol. Tovenen saveeŋ samia eta ivot ila avomim malep.<sup>y</sup> <sup>9</sup>Ve awatombanon gham malep. Pasa, ŋgar tiam muŋgina to ipazaagh gham pa ghamuuŋ ŋgar samsamia, yam apuli wa, inimale nonogiija to aghita isami ve apiyaava ilale. <sup>10</sup>Ve agham ŋgar paghu to Krisi inim lemim, inimale andud gham pa nonogiija paghu. Aazne, Krisi ighamgham uraat payam. Leso awatag katin Maaron to ighur gham, ve ŋgar toni ineeŋ tiam, ve avot animale ye tau.<sup>z</sup>

<sup>11</sup>Iit to Krisi igham ghiit tanim paghu, tasob rarateed moghon. Eta poia ilib pa ita ite maau. Tovenen ighaze iit Grika, ma iit Yuda, ma tizir ghiit, ma tizir ghiit maau, ma iit kankanooŋa ve tawatag saveeŋ Grik maau, ma tanim pa taan suruvu to Sikitia,<sup>a</sup> ma iit mbesooŋa to taneep ila daba toit sambadi, ma iit mbesooŋa maau ve tangin tauud, mbep naol tonene, nene mbep sorok. Ve Krisi to ineeŋ ila tamtoghon toni tisob lolodi, ye moghon to mbep tau.<sup>b</sup>

### Iit irau tapatoonŋ ŋgar to Maaron

<sup>12</sup>Maaron lolo payam, ve isia gham anim le wa. Tovenen yam irau agham ŋgar toni inim lemim, inimale andud gham pa nonogiija paghu. Ŋgar tovene: Lolomim isamin tamtoghon ve agham poian di. Atatan taumim izamim. Ve agham ŋgar pa taumim moghon malep. Matamim iŋgal nditamim ve agham ŋgar luuma padi. <sup>13</sup>Ighaze tamtoghon tigham samin gham, yam ayati malep. Ambaad patanani tonenen, ve apatoonŋ ŋgar luuma padi. Ve ighaze tiam eta igham ŋgar eta to irau lolomim maau, matamim kisin sosor toni malep. Yamŋa agharaat lolomim ve apul sosor toni, inimale Tiina toit Krisi ipul sosor tiam.<sup>c</sup>

<sup>14</sup>Ŋgar naol tonene, aseŋ di pa ŋgar to lolood pa tauud. Pasa, nene ilup ŋgar popoia tisob tinim ee moghon, ve igham di tivot poia kat.<sup>d</sup>

<sup>15</sup>Ŋgar luuma to Krisi irau igham pooz ila lolomim, ve ipatoonŋ gham pa sa ŋgar to pale aghami pa tamtoghon. Pasa, Maaron ipoi gham anim le, ve ilup gham anim Krisi anoŋa ee moghon, lesa ataghon ŋgar tovene. Ve lolomim poia pa Maaron, ve apaiti pa poia toni irau sawa isob.<sup>e</sup>

<sup>16</sup>Saveeŋ to Krisi irau ivon kat ve ineeŋ tunja ila lolomim. Ve apatoot nditamim ve apasalunŋan di pa ŋgar popoia naol naol. Ve ambou ve apait Maaron pa poia toni. Ambou mbouŋ to yes Israela to

y 3:8 2Kor 7:1; Ep 4:31, 5:4; Hib 12:1 z 3:10 Mbnp 1:26; Ro 12:2; Ep 4:22+

a 3:11 Tamtoghon to Sikitia tineep ndug dige kat. Tovenen tamtoghon tisob matadi izi padi tighaze yes kankanooŋa, tivot sone. Eemoghon ighaze yes Sikitia tighur ila to Krisi, nene Maaron ighita di ighaze yes raratedi tinimale yes Grika ve Yuda to tighur ila toni. b 3:11 Ro 10:12; 1Kor 7:19; Ga 3:28 c 3:13 Mk 11:25; Ga 5:22; Ep 4:2,32 d 3:14 Yo 15:12; Ro 13:8+; Ep 5:2; Kol 2:2 e 3:15 Yo 14:27+; Ro 12:5; Pil 4:7



timbood di, toman mbouŋ to suŋuŋ, ve mbouŋ pida to Maaron Avuvu ipamundigin gham ve atoor di ne paam.<sup>f</sup>

<sup>17</sup>Saveeŋ tiam toman uraat tiam, ve sa ŋgar ite paam to ighaze aghami, yam irau aghami ila Tiina toit Yesu iza pa apaiti. Ve lolomim poia pa Tamaan Maaron paam, ve apaiti pa poia toni ila Yesu iza.<sup>s</sup>

**Saveeŋ iŋarua yes vaivaiŋa**  
(*Ep 5:22–6:9; 1Pe 2:18–3:7*)

<sup>18</sup>Yam ndiliva, atatan taumim ve aneep ila ndizwamim sambadi. Pasa, ighaze iit to tanim Tiina toit Krisi le tataghon ŋgar tovene, nene denja.<sup>h</sup>

<sup>19</sup>Ve yam nditamoot, lolomim pa ndizwamim ve agham poian di. Agham samin di malep, ve agham ariana padi malep.

**Saveeŋ iŋarua yes ndipain**  
(*Ep 6:1-4*)

<sup>20</sup>Yam ndipain, alooŋ nditamamim ve nditinamim aliŋadi pa mbeb tisob. Pasa, ŋgar tovene igham Tiina toit Yesu lolo poia.

<sup>21</sup>Ve nditamandi paam, yam agham ariana pa ndinatumim malep. Pale agham di lolodi isami ve tighita taudi tighaze yes tirau mbeb eta maau.

**Saveeŋ iŋarua yes uraata ve daba todi**  
(*Ep 6:5-9; Tit 2:9-10*)

<sup>22</sup>Yam mbesooŋa, alooŋ daba tiam to taan aliŋadi pa mbeb tisob. Ve agham kaarom pa uraat malep. Mbesooŋa pida, ighaze tighita daba todi tinim, ghoru tigham poian uraat ila matadi, leso tigham di lolodi poia. Ve sawa to ighaze daba todi tipul di ve tila, ghoru tigham poian uraat maau. Yam agham tovene malep. Yam irau ambees padi pooi toman lolomim. Pasa, yam amatughez pa Maaron ve aghaze ataghon ŋgar toni.<sup>i</sup>

<sup>23</sup>Tovenen sa uraat to ighaze aghami, tinimim imbees pani ve aghami toman lolomim. Aghami inimale agham uraat pa tamtoghon maau. Aghami inimale agham uraat pa Tiina toit Yesu. <sup>24</sup>Ve yam awatag: Muri, Maaron pale igham lemim atia poia. Nene nepooŋ to ndug sambam. Yam izamim iyon pa ghamuŋi wa. Pasa, yam ambesmbees pa Tiina toit Krisi. <sup>25</sup>Eemoghon ighaze tamtoghon eta igham sosor, nene ye pale igham atia to sosor toni. Pasa, Maaron igham ŋgar pa tamtoghon izadi maau, ve ivool to eta maau. Gabizooŋ toni, ye itaghon ataam raraate moghon pa tamtoghon tisob.<sup>j</sup>

**4** <sup>1</sup>Ve yam to lemim mbesooŋa, agham ŋgar denja moghon padi. Ighaze avool to pida ve agham poian di, ve agham samin pida, nene

---

**f 3:16** 1Kor 14:26; Ep 5:19+    **g 3:17** 1Kor 10:31; 1Tes 5:18; Hib 13:15    **h 3:18** Tit 2:5  
**i 3:22** 1Tim 6:1    **j 3:25** Lo 10:17; Ro 2:11; 2Kor 5:10; 1Pe 1:17

poia maau. Yam irau ataghon ngar raraate pa mbesooŋa tiam tisob. Pasa, yam awatag: Yam lemim daba paam. Ye Tiina tiam to ineep izi sambam.

### Tapul suŋuŋ malep

<sup>2</sup>Yam apul suŋuŋ malep. Apamaat ariana, ve asuŋ irau sawa isob. Ve sawa to asuŋ, lolomim poia pa Maaron ve apaiti pa poia toni.<sup>k</sup>

<sup>3</sup>Ve aghur ghei ila suŋuŋ tiam paam. Aghason Maaron pa igharaat ataam payei. Leso nivotia saveeŋ to Kriŋi pa tamtoghon, ve nipaghazoŋan di pa Maaron ngar toni to muuŋ iyooŋ ve aazne ivot ighazoŋ. You, tighur ghou ila ruum to yabyabuŋ lolo pasa, navovotia saveeŋ tonene pa tamtoghon.<sup>l</sup>

<sup>4</sup>Tovenen yam aghason Maaron pa iuul ghou. Leso napaghazoŋan tamtoghon pa ngar toni yoŋgaŋ itaghon tau lolo.

<sup>5</sup>Yes to tineep ila lupuuŋ to Kriŋi lolo maau, matamim iŋgal pooi pa sa ngar to pale agham padi lesa aghereb di tinim Kriŋi le. Ve sawa isob, ighaze soso poia eta ivot payam pa apatoŋ di pa Kriŋi ngar toni, ghoru apatoŋ di pataghaŋ.<sup>m</sup>

<sup>6</sup>Ve yam asavia saveeŋ poia moghon pa tamtoghon. Leso lolodi pa saveeŋ tiam inimale aniiŋ poia to tighur te ila, ve tamtoghon lolodi tighaze le tighanghani moghon. Ve sei to ighaze ighason gham pa ghurla tiam, yam apamuul ghasoniiŋ toni toman ngar.<sup>n</sup>

### Paesiŋ pida

<sup>7</sup>Toŋvetaz toit Tikikus pale ipaes payam pa nepooŋ ve uraat tiou. Ye ŋgeu poia eez, ve lolog pani kat. Ye ighur lolo kat pa uraat to ulaaŋ tamtoghon to Kriŋi. Ve yeru niluplup ghei pa uraat ve nimbessmbees pa Tiina toit. <sup>8</sup>You naghaze nambaŋa ilat, lesa ipaes payam pa nepooŋ tiei, ve ipalot gham pa saveeŋ pida.<sup>o</sup>

<sup>9</sup>Ve ye moghon maau. Tamtoghon tiam eez, Onesimus, pale yesuru tilat. Onesimus, ye toŋvetaz toit kat. Ye ŋgeu eez to you nanumeera ve lolog pani kat. Sawa to tilat peria, yesuru pale tipaes payam pa mbep naol to ivotvot izi sualen.<sup>p</sup>

<sup>10</sup>Aristarkus to yeru nineep ila ruum to yabyabuŋ lolo ne, ndag poia toni ilat. Ve Markus to Banabas tazi, ye paam igham ndag poia payam. Paesiŋ to iŋarua, yam alooŋa wa. Ighaze ilat ivot, ghoru aghami toman lolomim poia.<sup>q</sup>

<sup>11</sup>Ve itaad ite Yesu to iza ite Yastus, ye paam igham ndag poia payam. Yuda tol tonene tipapalot ghou kat. Pasa, yes moghon, to yeiŋa niluplup ghei pa uraat to votiaŋ pooz to Maaron. Ve Yuda pida maau.

---

k 4:2 Ro 12:12; Ep 6:18; Pil 4:6; 1Tes 5:17    l 4:3 Ro 15:30; Ep 3:1+, 6:19+; Kol 1:26+  
 m 4:5 Ep 5:15+    n 4:6 Mk 9:50; Ep 4:29; 1Pe 3:15    o 4:8 Mbaŋ 20:4; Ep 6:21+  
 p 4:9 Plm 10+    q 4:10 Mbaŋ 12:25, 13:13, 15:37+, 27:2; Plm 24

<sup>12</sup>Itamim ite Epapras paam, igham ndag poia payam. Ye mbesoonja poia eez to Yesu Krisi. Moghon moghon, ye isunju Maaron ariana payam ighaze ayoon ariana pa ghurla tiam, ve ngar tiam imatu pa Maaron ve saveen toni, ve awatag katin ngar isob to Maaron lolo pani.<sup>r</sup>

<sup>13</sup>Epapras, you nighita ngar toni wa. Tauto naghaze nasaav payam: Ye igham uraat tiina kat payam. Ve igham uraat tiina pa nditaad pida to tineep izi Laodisia ve Hierapolis ne paam.

<sup>14</sup>Tojvetaz toit dokta Lukas to lolomai pani kat, yesuru Demas tigham ndag poia payam paam.<sup>s</sup>

<sup>15</sup>Ndag poia tiou ila pa tojvetaz toit pida to tineep izi Laodisia, ve ila pa olman tidi Nimpa, toman yes to tiluplup di pa sunju ila ruum toni lolo ne paam.

<sup>16</sup>Rau tonene, ighaze awaata le isob, ghoru asakia ila pa nditaad to Laodisia. Leso anadi tiwaata paam. Ve rau to nambooda ila todi, ighaze tighami ilat peria tiam, ghoru awaata paam.

<sup>17</sup>Asaav pa Arkipus tovene: “Uraat to Tiina toit to ilat nimam, matam ingali ve upasobi.”<sup>t</sup>

<sup>18</sup>You Paulus, taug nambood ndag poia tiou tonene. Lolomim imaagh payou malep. Pasa aazne, naneep ila ruum to yabyabuun lolo, ve tikau ghou pa sen.<sup>u</sup>

Poia to Maaron ineep toman gham. Onoon.